

cyBerita: Lelaman Internet Berita Harian Singapura.

[Singapura](#)

Kelab Mendaki usaha tingkat status Melayu/Islam

By Adli Yashir Kuchit

MENGUKUHKAN jalinan hubungan dengan badan-badan aktivis bukan Islam dan mencari jalan mempertingkatkan kedudukan masyarakat Melayu/Islam di sini.

Itulah antara tunggak program yang akan menjadi tumpuan Kelab Mendaki dalam tempoh tujuh bulan akan datang.

Membentangkan butir-butir rancangan itu dalam sidang media semalam, presiden kelab tersebut, Encik Aaron Maniam, berkata pihaknya akan turut menjayakan program-program sedia ada untuk membina keyakinan di kalangan generasi muda.

'Program Pembangunan Bakat (TDP) misalnya memberi peluang kepada para peserta, khususnya para graduan, memikirkan laluan kerjaya, mendapatkan panduan temu ramah, dan dengan cara ini mereka boleh merebut peluang kerjaya,' kata Encik Aaron.

Menampilkan ceramah karyawan dalam bidang tertentu, TDP juga membuka peluang kepada para peserta untuk mengetahui lebih lanjut tentang pilihan kerjaya yang terbuka kepada mereka.

Kelab Mendaki adalah badan Melayu/Islam yang dianggotai karyawan muda dan pelajar dengan penglibatan dalam ehwal masyarakat, Singapura dan dunia.

Dilancar pada tahun 2000 oleh Encik Lee Hsien Loong, yang ketika itu Timbalan Perdana Menteri, kelab tersebut adalah badan gabungan Yayasan Mendaki.

Dalam sidang media yang diadakan di OnePeople.sg di Toa Payoh semalam, Encik Aaron turut mendedahkan tentang program yang bakal dianjurkan sempena sambutan ulang tahun ke-10 kelab tersebut.

'Tema yang dipilih bagi perayaan ulang tahun ke-10 Kelab Mendaki ialah Membimbing Aspirasi dan Membina Jambatan,' kata Encik Aaron.

Sebagai permulaan, kelab tersebut akan menganjurkan Sidang Aktivis Belia pada Sabtu ini.

Sidang yang diadakan di Politeknik Republic itu akan menghimpunkan badanbadan aktivis belia setempat dan memberi peluang kepada para peserta untuk berkongsi idea dan membina rangkaian kerja.

'Kelab Mendaki juga akan mengembleng tenaga muda untuk mencari huraian kepada masalah yang membelengu masyarakat Melayu/Islam.

'Usaha ini akan diadakan menerusi satu sidang yang akan dianjurkan pada September nanti,' kata Encik Aaron.

Sidang yang diberi tajuk Gambaran Masa depan: Meninjau Masyarakat Melayu/Islam 2030 akan menampilkan sekitar 50 pemimpin muda.

Hasil daripada sidang itu akan disalurkan kepada Forum Pemimpin Masyarakat.

Bagi acara penutup, Kelab Mendaki akan menganjurkan satu sesi dialog yang akan menampilkan penceramah serantau.

Acara itu diharap dapat meningkatkan profil antarabangsa Kelab Mendaki.